



24. august 2018

UKA 2018/58

Inatsisartut Suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

Pisortat ingerlatseqatigiiffiisa allattugaataanik innuttaasut piniarsinnaalersinnissaat anguniarlugu Pisortat ingerlatsinerat pillugu paasitineqarsinnaatitaanermut inatsisartut inatsisaat allannortittariaqarneris pillugu apeqquteqaat aallaavigalugu oqallinnissamik siunnersuut.

(Inatsisartumut ilaasortaq Justus Hansen, Demokraatit)

Demokraatini isumaqarpugut pisorta qarfinni sapinngissamik ammanerpaamik paasiuminarnerpaamilu ingerlatsisoqartariaqartoq. Pingaaruteqarpoq innuttaasut tusagassiutillu allattugaatinik paasiniaasarsinnaanissaat taamaaliornikkullu malinnaavigalugu pisortani qanoq ingerlatsisoqarneris.

Allattugaatinik takusaqarsinnaatitaaneq kommuninut Namminersorlutik Oqartussanullu atuuppoq aamma Demokraatini qularinngilarput taamatut pisinnaatitaaffeqartoqarnerata kinguneranik pisortat malittarisassanut malinninnissartik ataqqinerusaraat aamma inatsisit naapertorlugit eqqortumik ingerlatsinissartik sissuernerusaraat.

Pisortalli ingerlatsinerat pillugu paasitineqarsinnaatitaanermut inatsit maannakkut atuuttoq pissutaallu pisortat ingerlatseqatigiiffii allattugaatinik ujartuiffigineqarsinnaanngillat. Tassa imaappoq pisortat ingerlatseqatigiiffii pisorta qarfitulli ammasuunissaannik paasiuminartumillu ingerlatsinissaat piumasaqaatigineqarsinnaanngilaq.

Danskit pisortat ingerlatsinerat pillugu paasitineqarsinnaatitaanermut inatsisaanni allassimavoq ingerlatseqatigiiffimmut pisortat minnerpaamik 75 %-mik pigineqataassuteqaraangata, taava innuttaasoq kinaluunniit imaluunniit tusagassiorfik ingerlatseqatigiiffiup ingerlanera pillugu allattugaatinik paasiniaasinnaatitaavoq. Pisinnaatitaaffik tamanna nunatsinni atunngilaq tamannalu Demokraatini assut uggoraarput.

Isumaqarpugut qinikkatut qularnaarniartariaqaripput inuiaqatigiinnik pilersitsinissarput ammanerpaanik aamma paasiuminarnerpaamik ingerlariaaseqartunik. Tamanna tunngavigalugu isumaqarpugut, kukkunerusoq, periuseqaratta ingerlatseqatigiiffiik pisortanit pigineqartut allattugaataanik paasiniaavigisinnaanagit, tamannalu allannortikkusupparput.

Aamma tassunga atatillugu maluginiartariaqarparput Pisortat ingerlatsineranni suliassat



suliarineqartarnerat pillugu inatsit aamma Pisortat ingerlatsinerat pillugu paasitineqarsinnaatitaanermut inatsit Inissiaatileqatigiiffimmut INI A/S-mut atortussanngortitaareernikuummata. Tamanna pivoq A/S Inissiaatileqatigiiffik INI-mi suliassat suliarineqartarnerat paasitineqarsinnaatitaanerlu pillugit Namminersornerullutik Oqartussat nalunaarutaat nr. 37, 19. december 1996-imeersoq aqqutigalugu.

Demokraatini tamanna tunngavigalugu nalilerparput mannakkut malittarisassat tunngavigalugit Namminersorlutik Oqartussat piginneqatigiiffiisa sinnerinut assigusunik malittarisassiortoqarsinnaasoq.

Qilanaarpunga uunga oqallinnermut pingaarutilimmut partiit sinnerisa Naalakkersuisullu saqqummiussinissaannut.